

國學基本典籍叢刊

杜澤遜 審定

宋本論衡 六

國家圖書館出版社

(漢)王充 撰

宋本論衡

第六冊

國家圖書館出版社

第六冊目錄

卷二十五	詰術篇		一
	解除篇		一〇
	祀義篇		一八
	祭意篇		二八
卷二十六	實知篇		三九
	知實篇		五六
卷二十七	定賢篇		七七
卷二十八	正說篇		一〇五
	書解篇		一二二

卷二十九

案書篇

.....

一三五

對作篇

.....

一四五

卷三十

自紀篇

.....

一五七

論衡卷第二十五

王充

詰術篇

解除篇

祀義篇

祭意篇

詰術篇

圖宅術曰宅有八術以六甲之名數而第之第定名
立宮商殊別宅有五音姓有五聲宅不宜其姓姓與
宅相賊則疾病死亡犯罪遇禍詰曰夫人之在天地
之間也萬物之貴者耳其有宅也猶鳥之有巢獸之
有穴也謂宅有甲乙巢穴復有甲乙乎甲乙之神獨
在民家不在鳥獸何夫人之有宅猶有田也以田飲

食以宅居處人民所重莫食最急先田後宅田重於宅也田間阡陌可以制八術比土爲田一字可以數甲乙甲乙之術獨施於宅不設於田何也府廷之內吏舍比屬吏舍之形制何殊於宅吏之居處何異於民不以甲乙第舍獨以甲乙數宅何也民間之宅與鄉比屋相屬接界相連不并數鄉亭獨第民家甲乙之神何以獨立於民家也數宅之術行市亭數巷術以第甲乙入市門曲折亦有巷術人晝夜居家朝夕坐市其實一也市肆戶何以不第甲乙州郡列居縣邑雜處與街巷民家何以異州郡縣邑何以不數甲乙

也天地開闢有甲乙邪後王乃有甲乙如天地開闢
本有甲乙則上古之時巢居穴處無屋宅之居街巷
之制甲乙之神皆何在數宅既以甲乙五行之家數
曰亦當以甲乙甲乙有支干支干有加時支干加時
專比者吉相賊者凶當其不舉也未必加憂支辱也
事理有曲直罪法有輕重上官平心原其獄狀未有
支干吉凶之驗而有事理曲直之效爲支干者何以
對此武王以甲子日戰勝紂以甲子日戰負二家俱
期兩軍相當旗幟相望俱用一日或存或亡且甲與
子專比昧爽時加寅寅與甲乙不相賊武王終以破

紂何也日火也在天爲日在地爲火何以驗之陽燧鄉曰火從天來由此言之火曰氣也日有甲乙火無甲乙何日十而辰十二日辰相配故甲與子連所謂日十者何等也端端之日有十邪而將一有十名也如端端之日有十甲乙是其名何以不從言甲乙必言子丑何日廷圖甲乙有位子丑亦有處各有部署劉布五方若王者營衛常居不動今端端之日衛旦出東方夕入西方行而不已與日廷異何謂甲乙爲日之日乎術家更說日甲乙者自天地神也日更用事自用甲乙勝負爲吉凶非端端之日名也夫如是

於五行之象徒當用甲乙決吉凶而已何爲言加時
乎按加時者端端之日加也端端之日安得勝負五
音之家用口調姓名及字用姓定其名用名正其字
口有張歛聲有外內以定五音宮商之實夫人之有
姓名者用稟於天天得五行之氣爲姓邪以口張歛
聲外內爲姓也如以本所稟於天者爲姓若五穀萬
物稟氣矣何故用張口歛聲內外定正之乎古者因
生以賜姓因其所生賜其姓也若夏吞薏苡而生則
姓苡氏商吞燕子而生則姓爲子氏周履大人綦則
姬氏其立名也以信以義以像以類以名生爲信若

魯公子友生文在其手曰友也以德名爲義若文王爲昌武王爲發也以類名爲像若孔子名丘也取於物爲假若宋公名杵臼也取於父爲類有似類於父也其立字也展名取同義名賜字子貢名予字子我其立姓則以本所生置名則以信義像假類字則展名取同義不用口張歛外內調宮商之義爲五音術何據見而用古者有本姓有氏姓陶氏田氏事之氏姓也上官氏司馬氏吏之氏姓也孟氏仲氏王父字之氏姓也氏姓有三事乎吏乎王父字乎以本姓則用所生以氏姓則用事吏王父字用口張歛調姓之

義何居凶奴之俗有名無姓字無姓與相調諧自以
壽命終禍福何在禮買妾不知其姓則卜之不知者
不知本姓也夫妾必有父母家姓然而必卜之者父
母姓轉易失實禮重取同姓故必卜之姓徒用口調
諧姓族則禮買妾何故卜之

圖宅術曰商家門不宜南向徵家門不宜北向則商
金南方火也徵火北方水也水勝火火賊金五行之
氣不相得故五姓之宅門有宜向向得其宜富貴吉
昌向失其宜貧賤衰耗夫門之與堂何以異五姓之
門各有五姓之堂所向無宜何門之掩地不如堂廡

朝夕所處於堂不於門圖吉凶者宜皆以堂如門人所出入則戶亦宜然孔子曰誰能出不由戶言戶不言門五祀之祭門與戶均如當以門正所向則戶何以不當與門相應乎且今府廷之內吏舍連屬門向有南北長吏舍傳間居有東西長吏之姓必有宮商諸吏之舍必有徵羽安官遷徙必有角姓門南向也失位貶黜未必商姓門北出也或安官遷徙或失位貶黜何姓有五音人之質性亦有五行五音之家商家不宜南向門則入稟金之性者可復不宜南向坐南行步乎一曰五音之門有五行之人假令商姓口

食五人五人中各有五色木人青火人赤水人黑金人白土人黃五色之人俱出南向之門或凶或吉壽命或短或長凶而短者未必色白吉而長者未必色黃也五行之家何以為決南向之門賊商姓家其實如何南方火也使火氣之禍若火延燔徑從南方來乎則雖為北向門猶之凶也火氣之禍若夏日之熱四方洽浹乎則天地之間皆得其義南向門家何以獨凶南方火者火位南方一曰其氣布在四方非必南方獨有火四方無有也猶水位在北方四方猶有水也火滿天下水辨四方火或在人之南或在人之北

謂火常在南方是則東方可無金西方可無木乎

解除篇

世信祭祀謂祭祀必有福又然解除謂解除必去凶
解除初禮先設祭祀比夫祭祀若生人相賓客矣先
為賓客設膳食已驅以刃杖鬼神如有知必恚止戰
不肯徑去若懷恨反而為禍如無所知不能為凶解
之無益不解無損且人謂鬼神何如狀哉如謂鬼有
形象形象生人生人懷恨必將害人如無形象與煙
雲同驅逐雲煙亦不能除形既不可知心亦不可圖
鬼神集止人宅欲何求乎如勢欲殺人當驅逐之時

避人隱匿驅逐之止則復還立故處如不欲殺人寄託人家雖不驅逐亦不爲害貴人之出也萬民並觀填街滿巷爭進在前士卒驅之則走而却士卒還去即復其處士卒立守終日不離僅能禁止何則欲在於觀不爲一驅還也使鬼神與生人同有欲於宅中猶萬民有欲於觀也士卒驅逐不久立守則觀者不却也然則驅逐鬼者不極一歲鬼神不去今驅逐之終食之間則舍之矣舍之鬼復還來何以禁之暴穀於庭鷄鳥啄之主人驅彈則走縱之則來不終日立守鷄雀不禁使鬼神乎不爲驅逐去止使鬼不神乎

與鷄雀等不常驅逐不能禁也虎狼入都弓弩秦之
雖殺虎狼不能除虎狼所爲來之患盜賊攻城官軍
擊之雖盜賊却不能滅盜賊所爲至之禍虎狼之來
應政失也盜賊之至起世亂也然則鬼神之集爲命
絕也殺虎狼却盜賊不能使政得復也然則盛解除
驅鬼神不能使凶去而命延病人困篤見鬼之至性
猛剛者挺劍操杖與鬼戰鬪戰鬪一再錯指受服知
不如必不終也夫解除所驅逐鬼與病人所見鬼無
以殊也其驅逐之與戰鬪無以異也病人戰鬪鬼猶
不去宅主解除鬼神猶不離由此言之解除宅者何

益於事信其凶去不可用也。且夫所除宅中客鬼也。宅中主神有十二焉。青龍白虎列十二位。龍虎猛神。天之正鬼也。飛尸流凶。安敢妄集。猶主人猛勇姦客。不敢闕也。有十二神舍之宅主驅逐。名爲去十二神之客。恨十二神之意。安能得吉。如無十二神。則亦無飛尸流凶。無神無凶。解除何補。驅逐何去。解逐之法。緣古逐疫之禮也。昔顓頊氏有子三。人生而皆亡。一居江水。爲虐鬼。一居若水。爲魍魎。一居歐隅之間。主疫病人。故歲終事畢。驅逐疫鬼。因以送陳迎新。內吉也。世相倣效。故有解除。夫逐疫之法。亦禮之失也。行